

NO. SOALAN : 49

**PEMBERITAHUAN PERTANYAAN DEWAN RAKYAT YANG  
KETIGA BELAS, PENGGAL KELIMA, MESYUARAT KETIGA**

**PERTANYAAN : LISAN**

**DARIPADA : DATO' DR. TAN KEE KWONG  
[ WANGSA MAJU ]**

**TARIKH : 6 NOVEMBER 2017 (ISNIN)**

**Dato' Dr. Tan Kee Kwong [ Wangsa Maju ]** minta **PERDANA MENTERI** menyatakan apakah perkembangan pemberian insentif untuk peneroka dan warga Lembaga Kemajuan Tanah Persekutuan (FELDA), sama ada mereka telah menerima bayaran insentif khas, dana khas pelupusan hutang tanam semula, geran khas dan pembinaan rumah.

93

**JAWAPAN: YB DATO' RAZALI BIN IBRAHIM,**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, insentif kepada warga peneroka FELDA ini adalah sebagaimana yang diumumkan semasa sambutan Hari Peneroka FELDA 2017.

Insentif Pertama, Pembayaran Insentif Khas FELDA sebanyak RM5,000 se peneroka telah dilaksanakan bayaran secara berperingkat mulai 30 Ogos 2017 kepada seramai 94,956 peneroka layak penuh iaitu peneroka yang kebunnya diuruskan sepenuhnya oleh FELDA dan menghantar hasil melalui pengurusan FELDA secara konsisten. Manakala baki peneroka seramai 17,679 yang dikategorikan tidak layak tetapi mereka diberi peluang untuk bermuafakat kembali bersama FELDA, dengan syarat menghantar hasil melalui pengurusan FELDA bermula Ogos 2017. Tempoh muafakat adalah selama 6 bulan di mana mereka yang memenuhi syarat akan dibayar bermula Februari 2018.

Bagi insentif Pelupusan Hutang Tanam Semula yang berjumlah RM5,000.00 se peneroka, FELDA sedang membuat semakan dan pengesahan bagi setiap peneroka yang layak.

Insentif Dana Khas Pelupusan Hutang Tanam Semula pula, FELDA memperuntukkan sebanyak RM300 juta bagi tempoh lima tahun (RM60 juta setiap tahun). Dana ini bertujuan untuk menampung lebihan kos tanam semula ladang peneroka yang telah dilaksanakan dan membantu mengurangkan beban peneroka FELDA yang tidak mendapat bantuan

seperti pekebun kecil. FELDA juga sedang membuat semakan dan pengesahan bagi setiap peneroka yang layak beserta nilai yang akan diperolehi.

Manakala bagi insentif Geran Khas Tanam Semula Peneroka, kerajaan melalui Lembaga Minyak Sawit Malaysia (MPOB) akan memperuntukkan sebanyak RM257.5 juta iaitu melibatkan seramai 11,797 orang peneroka yang akan menjalankan tanam semula ladang bermula tahun 2018 sehingga 2021. Insentif Pelupusan Hutang, Dana Khas dan Geran Khas Tanam Semula akan bermula pada awal tahun 2018.

Bagi insentif Kelulusan Lebih Satu Unit Rumah Dalam Satu Tapak, pihak FELDA telah mengeluarkan pekeliling permohonan yang berkuatkuasa mulai 1 Oktober 2017. FELDA juga telah mengeluarkan borang permohonan beserta dokumen-dokumen sokongan yang perlu seperti Surat Akuan persetujuan pemilik berdaftar dan Surat Akuan persetujuan waris-waris. Semua dokumen ini telah diedarkan kepada semua peringkat Rancangan dan Wilayah FELDA agar insentif ini dapat dilaksanakan dengan lancar. Pembinaan rumah ini boleh dibuat dengan pembiayaan sendiri oleh pihak pemohon, pengeluaran KWSP atau membuat permohonan sendiri melalui skim pinjaman Syarikat Perumahan Negara Berhad (SPNB).

Sekian. Terima kasih.